



Komunikadu Imprensa
Parlamentu Nasionál
20 Dezembru 2016

**Prezenta Prezidente Autoridade ZEEMS hanesan deputadu durante
diskusaun OJE kada tinan:
Ne'e infrasaun ba lei, konflitu interesse no inkompatibilidade prevalese**

Prezenta Prezidente Autoridade ZEEMS, Dr. Marie Alkatiri hanesan deputadu durante diskusaun Orsamentu Jerál Estadu (OJE) kada tinan iha Parlamentu Nasionál (PN), hamosu preokupasaun públiku relasiona ho kestaun sira kona-ba legalidade, konflitu interesse no inkompatibilidade tuir lei.

Iha mandatu lejislatura datoluk, Dr. Marie Alkatiri eleitu nu'udar deputadu iha Parlamentu Nasionál (PN) hosi Bankada Fretilin. Mezmu nune'e, Deputadu Marie Alkatiri nunka partisipa iha sesaun plenaria sira seluk no/ka partisipa iha servisu Komisaun Espesializada Permanente sira iha PN, maibé so partisipa de'it iha plenaria ba diskusaun kona-ba OJE nian kada tinan.

Durante asume pozisaun nu'udar deputadu, Dr. Marie Alkatiri la ativu hanesan deputadu, fatin ne'e mós la iha substituisaun hosi deputadu seluk hosi Bankada Fretilin, no pozisaun ne'e mamuk durante período lejislatura datoluk nian, inklui bainhira asume kargu hanesan Prezidente Autoridade ZEEMS nian. Ne'e signifika mós katak Bankada Fretilin rasik lakon ona votu hirak ne'ebé elitór rihun balun depozita hela liuhosi Fretilin, tanba votu ne'e la-utiliza ho efetivu durante lejislatura datoluk no votu hirak ne'e bele konsidera saugate de'it.

“Kestaun sira hanesan ne'e, tuir loloos bele evita atu hatudu katak ema hotu respeitu prinsípiu sira ne'ebé hatur ona iha lei, liu-liu líder no figura sentráal sira hanesan Dr. Marie Alkatiri. Líder sira hanesan ne'e tenke husik hela buat di'ak ba ita nia sistema no nasaun no la'ós sai fali obstákulu ka dezafiu” dehan Luis de Oliveira Sampaio, Diretór Ezekutivu JSMP.

JSMP preokupa kestaun sira kona-ba “legalidade, konflitu interesse entre pozisaun nu'udar deputadu ka membru órgaun lejislativu no pozisaun nu'udar Prezidente ZEEMS ka membru órgaun ezekutivu durante diskusaun OJE. Rasionalmente, tuir prinsípiu separasaun podér iha sistema demokrátiku, la iha lójika atu membru ezekutivu sai fali membru lejislativu hodi aprova orsamentu ba nia-an rasik no fiskaliza nia-servisus rasik. Ne'e mak konflitu interesse prevalese teb-tebes iha situasaun hanesan ne'e.

Pozisaun ne'ebé Dr. Marie asume mós kontráriu ho devér deputadu nian tuir Artigu 10 Lei [Nú. 15/2009](#)¹ kona-ba Rejimentu Parlamentu. Parlamentu Nasionál tenke foti medida sira tuir Artigu 8 Lei Nú. 5/2004 kona-ba Estatutu Deputadu sira nian no Artigu 7 (a) Rejimentu Parlamentu kona-ba deputadu ida sei lakon nia mandatu hanesan deputadu bainhira la partisipa iha reuniaun plenaria dala 5 tui-tuir malu.

JSMP mós observa katak inkompatibilidade ne'ebé define iha Artigu 13 1) letra d) Lei Nú. 5/2004 kona-ba Estatutu Deputadu la fó dalan ba deputadu ida atu asume kna'ar nu'udar representante ezeutivo iha kargu públiku iha tempu ne'ebé hanesan.

Aleinde ne'e iha Artigu 15 alinea 1) letra b) Lei [Nú. 3/2014](#)² define katak Prezidente Autoridade ZEEMS hanesan Órgaun Ezeutivo Estadu no funsióriu Estadu. Nune'e mós iha Artigu 20 alinea (1) no (2) Dekretu-Lei Nú. 5/2015 kona-ba Natureza no Nomeasaun ba Prezidente Autoridade ZEEMS nian prevee katak Prezidente Autoridade nu'udar órgaun ezeutivo no representante másimu iha rejiaun ne'ebé responde ba órgaun soberania sira kona-ba ezersísiu ba nia-podér sira (alinea 1) no Prezidente Autoridade ne'e nomeadu hosi Prezidente Repúblika tuir proposta Primeiru Ministru nian (alinea 2)³.

Hanesan funsióriu estadu ka funsióriu públiku, Lei Nú. 8/2004 ne'ebé aprova Estatutu Funsau Públiku nian (ne'ebé altera ho Lei Nú. 5/2009) iha Artigu 10 alinea (2) kona-ba konfliktu interesse, bandu atu funsióriu públiku sira la bele iha interesse ka involve iha organizaun públika ka privada ne'ebé hamosu konfliktu interesse ne'ebé ligadu ho nia pozisaun ofisiál⁴.

JSMP rekomenda ba komisaun G ne'ebé trata ba asuntu Étika deputadu sira nian atu elabora paraser ruma tuir Lei [No. 5/2004](#)⁵ kona-ba Estatutu Deputadu nian no apresenta ba plenaria atu halo apresiasaun no ezamina kestaun sira kona-ba hahalok sira ne'ebé la tuir lei (ilegalidade), konfliktu interesse no inkompabilidade.

JSMP kondena maka'as aktu ignoránsia politika ida-ne'e, tanba PN husik hela prátika hirak ne'e la'o livre loos sein kestiona. JSMP konsidera Parlamentu Nasionál pasivu liu durante ne'e no intensionalmente husik hela aktu inkomprimentu ne'ebé akontese hodi la foti medidas ruma hasoru deputadu ne'ebé la kumpri nia devér tuir Rejimentu no Estatuta Deputadu nian.

JSMP konsidera katak hahalok ne'e mós la fó lisaun política edukativu ba públiku, liuliu ba jersaun foun sira iha ukun aban-bain rua no sei hamosu de'it ejemónia hodi abuzu podér ne'ebé la tuir lei no kontra-produtivu ho interesse nasional.

¹ Lei Nú. 15/2009 kona-ba Rejimentu Parlamentu Nasionál
http://www.mj.gov.tl/jornal/public/docs/2009/serie_1/serie1_no40.pdf

² Lei [No. 3/2014](#) kona-ba Criação a Região Administrativa Especial de Oe-Cusse Ambeno e estabelece a Zona Especial de Economia Social de Mercado, 18/06/2014; <http://www.mj.gov.tl/jornal/?q=node/6670>

³ Dekretu-Lei Nú. 5/2015 kona-ba Estatutu Rejiaun Administrativa Espesial Oecusse-Ambeno nian:
<http://www.mj.gov.tl/jornal/?q=node/6571>

⁴ Lei Nú. 5/2009 ne'ebé altera Lei Nú. 8/2008 kona-ba Estatu Funsau Públika.

⁵ Lei [Nú. 5/2004](#) kona-ba Estatutu Deputadu sira nian
http://www.mj.gov.tl/jornal/public/docs/2002_2005/leis_parlamento_nacional/5_2004.pdf

Atu hetan informasaun liutan favór kontaktu direktamente:

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org